

Lungzanh Ciet Lijyouz Vwnzva “Naz” Haimuq

隆安“那”文化旅游节开幕

5 nyied 14 hauh, 2016 Cungguek • Lungzanh ciet lijyouz vwnzva “naz” nem ciet hongdawz “seiq nyied bet” youq Namzningz Si Lungzanh Yen Nazdungz Cin hainduj, vwnzva “naz” gig miz daegsaek Bouxcuengh naekna, yinx ndaej haujlai hekyouz daeuj yawjngonz youzcet. Aen ciet lijyouz neix laebdaeb daengz 5 nyied 16 hauh, hozdung neiyungz fungfouq, ndei yawj raixcaix.

Gwnz gaihmusiz, baenzdaug vwnzva “naz” conzdungj minzsuz cezmuz ronghsien—foux lungz foux saeceij hoh ciet、gouz fwn yizsi、caeqlaiq hongdawz、gingq vaiz yizsi daengj, gij ceiq ndei vwnzva “naz” nyuenz miz neix, yinx ndaej bouxyawj bekwngz haenhndei. Ngoenzhaenx, yienhsingz lij miz diuz gai gijgwn ndei dem. Gwnz gai baij rim gijgwn ndei ndawbiengz miz Lungzanh bonjdieg daegsaek haenx, hawj guengjdaih hekyouz daejniemh vwnzva “naz” naekna, doengzseiz cimz le gijgwn ndei Lungzanh gig miz daegsaek haenx, roxnyinh gij yiedcingz gyaez hek Lungzanh.

(Lij Ginz Dangz Ciuhyen Nungz Gencangh)



▲Guh gouz fwn yizsi.



▲Foux lungzfiengz koh ciet.

Swnjcienz Heiqcuengh Daj Iq Hag

传承壮剧从娃娃抓起

5 nyied 12 hauh, gyoengq lwgnyez youq aen yangh yisuz ndawbiengz Guengjsae—Lingzyinz Yen Cauzlij Yauzcuz Yangh Luzcoz Cunh Mbanj-nazbaz hag Heiqcuengh. Gaenh geij bi neix daeuj, aen yienh neix gig yawjnaek minzcuz vwnzva yisuz vatcimh caeuq swnjcienz, gaenxmaenx damqra gij roenloh swnjcienz minzcuz vwnzva, aeu swnjcienz vwnzva Heiqcuengh hawj lwgnyez daj iq hag, hawj Heiqcuengh ndaej laebdaeb cienz roengzbae.

(Loz Hihhaij/罗希海)



▲Lwgnyez cingq hag Heiqcuengh.

Lungzswng: Banh Ciet Vwnzva Gijgwn Ndei Ndawhag Angqcoux “Seiq Nyied Bet”

龙胜：举办校园美食文化节迎接“四月八”



▲Hagseng cawj gijgwn ndei.

5 nyied 12 hauh, Lungzswng Gak Cuz Swciyen Majdiz Siujoyz banh gaiq daih’ it “ciet vwnzva gijgwn ndei haeuxnaengj hom” hozdung, angqcoux “seiq nyied bet” ciet minzsuz conzdungj yaek daengz haenx. Hozdung seiz, lauxsae sonyinx gyoengq hagseng guh haeux-naengj haj saek、bau aen’gyauj、cauj nohlab daengj gijgwn ndei lai cungj lai yiengh, vanzlij aeu gijgwn ndei gak aen ban guh haenx guh doxbeij, doeklaeng bingzok ceiq feihdauh gijgwn ndei, doenggvaq daejniemh hozdung, caenh’itbough daezsang gij naengzlig doengh-fwnz caeuq dox boiqhab hagseng.

(Banh Cisiengz/潘志祥 Yangz Mingzyen/杨明艳)



▲Hwnjdangz yienhciengz.

Dwzbauj Yen Guh Cuengh Gun Song Saw Vah Laexsae Beizyin

德保县举行壮汉双语教师培训

5 nyied 5 daengz 8 hauh, Dwzbauj Yen banh 2016 nienz Cuengh Gun song saw vah lauxsae beizyinbanh, 46 boux lauxsae Cuengh Gun song saw vah daj Duh’anh、Lungzsangh caeuq Nazgyap daengj yanghcin saedniemh sonhag Cuengh Gun song saw vah caeuq Yen Minzcuz Cunghyoz daeuj haenx camgya beizyin.

Gwnz hoihbeizyin, Dwzbauj Yen Gyauyuz Gunghveij suhgi、Yen Gyauyuzgiz Dangjcuj fusuhgi、fugizcangj Lij Cin vih gyoengq yozyenz ganggej le minzcuz yijyenz cwngcwz caeuq song saw vah hagdangz gyauyuz sonhag guenjieix. Swcigih Gyauyuzdingh yisinj Lingz Hinghningz faenbied gangj son le gij doxbeij Vahcuengh bonjdieg caeuq biucinj Vahcuengh、Cuengh Gun yijfaz doxbeij、Cuengh Gun fanhoiz gi’gyauj caeuq “song loih vunqsik” mizyauq sonhag cijdauj daengj gocwngz. Yen Sawcuengh Hagdangz yaucangj Nungz Yimeiz guh le Cuengh Gun song saw vah godiz yenzgiu cijdauj.

(Luz Sanh/陆 杉)